

Акафист преподобному и богоносному отцу нашему Савве Освященному Иерусалимскому.

Кондак 1.

Избранный чудотворче и предивный угодниче христов, преподобне отче Савво, миру православному светильниче и теплый о нас пред Богом молитвенниче! Величаем прославльшаго тя Господа, восхваляюще любовию равноангельное житие твое. Ты же, яко имеяй велие дерзновение ко Господу, от всяких нас бед свободи, да с радостию зовем ти: Радуйся, пресветлая монахов похвало, Савво преподобне.

Икос 1.

Ангелов Творец и всяя твари Содетель избра тя от младенства, преподобне, прославити трисиятельное имя Его: ты бо, осмилетен сый вся красная мира тленнаго презрев, во обитель святую притекл еси, идеже яко ангел земный богоугодно подвизался еси. Темже и вселися в тя благодать Пресвятаго Духа, Егоже действием светло украшаяся, ангелоподобное житие показал еси. Мы же, зряще велия исправления твоя, с любовию вопием тебе сице: Радуйся, родителей благочестивых благословенный плоде; Радуйся, каппадокийския страны святое украшение. Радуйся, палестинския земли и града Иерусалима светильниче; Радуйся, во иорданстей пустыни со ангелы вселившийся. Радуйся, яко жертву живую себе Господви принесл еси. Радуйся, евангелиа Христова усердный последователю; Радуйся, заповедей Господних верный блюстителю. Радуйся, яко от юности игу Христову себе поработил еси; Радуйся, яко красоту тленную и мирскую сладость ни во чтоже вменил еси. Радуйся, Божия разума исполненный; Радуйся, благодатию Духа святаго приосененный. Радуйся, пресветлая монахов похвало, Савво преподобне.

Кондак 2.

Видев всеведец Господь благое души твоея произволение, еже работати ему усердно вся дни живота твоего, еще во юности прослави тя божественною Своею силою: любви бо ради братския в разжженную пещь вступив и одежды твоя неопалены сохранив, благодатию Божию неврежден от огня пребыл еси. Сего ради прославляюще Царя славы Христа, прославляющаго святых своя, вопием ему: Аллилуиа.

Икос 2.

Разум просвещен от Бога имея, преподобне отче Савво, диавольския искушения присно разумевал еси; егда бо прелестник рода человеческого искуси тя взяти плод древа прежде старчаго благословения, абие помянул еси прародители, в раи прельстишася. Темже поверг плод на землю; ногами сей попрал еси, заповедав себе до смерти не вкусити плода сего, главу древняго змия сокрушая. Сего ради приими от нас похвалы сия: Радуйся, от юности постническое житие показавый; Радуйся, на высоту добродетелей возшедый. Радуйся, монашескаго жития и устава истовое правило; Радуйся, ревностный исполнителю отеческих преданий. Радуйся, яко любве ради брата в пещный пламень вшел еси; Радуйся, яко силою благодати Христовы от огня не опален изшел еси. Радуйся, всецелое послушание Господу Богу совершивый; Радуйся, главу древняго запинателя сокрушивый. Радуйся, на высоту безстрастия возшедый; Радуйся, козни демонския до конца победивый. Радуйся, благое иго Христово на рамена твоя восприявый; Радуйся, закона бж~ия от всея души взыскавый. Радуйся, пресветлая монахов похвало, Савво преподобне.

Кондак 3.

Сила Вышняго, просвещающая всякаго человека, грядущаго в мир, и показующая пути правыя, настави тя, преподобне отче Савво, достигнути святаго града Иерусалима, идеже поклонился еси Живоносному Гробу воскресшаго Христа, и со слезами облобызав, благодарственно воспел еси ему песнь: Аллилуиа.

Икос 3.

Имея велию ревность о подвизе монашескаго равноапостольнаго жития, преподобне, потщался еси ити во иорданскую пустыню, идеже наставника себе обрет великаго Евфимия и того житию достойно поревновав, святому Крестителю Христову Иоанну в подвизех твоих уподобился еси. Мы же, дивящися богатству добродетелей твоих, усердно вопием ти: Радуйся, житию безплотных поревновавый; Радуйся, подвигом древних святых отец достойно подражавый. Радуйся, пустыни иорданския благодатное прозябение; Радуйся, святаго жития благоухание. Радуйся, благодати Христовы сосуде избранный; Радуйся, пустынное житие паче всего возлюбивый. Радуйся, страстей терния усердно исторгавый; Радуйся, во юном возрасте мудростию Христовою просвещенный. Радуйся, чистоты душевныя и телесныя усердный ревнителю; Радуйся, умнаго трезвения неусыпный хранителю. Радуйся, лестницею добродетелей к небесным обителем возшедый; Радуйся, яко финикс в пустыни процветый. Радуйся, пресветлая монахов похвало, Савво преподобне.

Кондак 4.

Бурю внутрь помыслов и страстей волны безбедно прешед, преподобне отче Савво, обрел еси тихое пристанище Христа, Емуже неленостно во мнозе долготерпении поработал еси; отнюдуже божественною благодатию Христовою восходя от силы в силу от деяния к боговидению, небеснаго Сиона достигл еси, идеже со ангелы поеши Троице Святей песнь: Аллилуиа.

Икос 4.

Слышаще дивная твоя наставления, яже не точию в словесех, но и в подвизех твоих являл еси, прихождаху к тебе издалеча жаждущии спасения, подражати добродетелем твоим отче, мудро назидав и к Небесному Царствию управляя всех, верою притекающих к тебе, светильник православия соделался еси. Сего ради с любовию вопием ти: Радуйся, наставниче монахов Богомудрый; Радуйся, овец христовых добрый пастырю. Радуйся, ко спасению верный путеводителю; Радуйся, постников дивный учителю. Радуйся, крепкое падающих возведение; Радуйся, правостоящих утверждение. Радуйся, Евангелиа Христова усердный послушателю; Радуйся, иноческаго жития добрый наставниче. Радуйся, яко огнем молитвы стрелы вражия попалил еси; Радуйся, яко еще во плоти сый, райскую сладость предвкусил еси. Радуйся, пустынный жителю и в телеси ангеле: Радуйся, вселенныя светильниче. Радуйся, пресветлая монахов похвало, Савво преподобне.

Кондак 5.

Боготечней звезде уподобился еси, блаженне Савво, смирением возвышаемый и в горняя чертоги востекый, научая всех горняя мудрствовати, а не земная, от страстей отрешатися, со Христом жити и от сердца воспевати ему: Аллилуиа.

Икос 5.

Видевше тя ученицы твои наставника премудра и знамением небесныя благодати сияюща, дивляхуся, тщащеса твоему житию подражати; яко бо луча светлаго солнца правды, просветися житие твое. Сего ради слыши от всех похвальная пения таковая: Радуйся, восточная звездо златозарнейшая; Радуйся, ангелов собеседниче. Радуйся, постников похвало; Радуйся, безмолвствующих славо. Радуйся, учителю смирения и целомудрия; Радуйся, образе кротости и послушания. Радуйся, яко во глубины нищеты духовныя приникл еси; Радуйся, яко на высоту добродетелей возшел еси. Радуйся, яко путь к животу вечному обрел еси; Радуйся, яко исправлению твоими безплотныя удивил еси. Радуйся, множество душ уневестивый Христу; Радуйся, купно с ними пребываяй в радости Господа твоего. Радуйся, пресветлая монахов похвало, Савво преподобне.

Кондак 6.

Проповедник и исполнитель евангельских словес, еже не скривати себе сокровищ на земли, явился еси, еже Единого Господа искати во вся дни жизни своея, всем сердцем тому прилепятся и непрестанно пети ему: Аллилуиа.

Икос 6.

Возсия свет божественный, в нощи молящуся тебе, преподобне, показуя столпом огненным пещеру нерукотворену, юже храм соделал еси, и тамо великую лавру устроил, богоугодныя подвиги и молитвенныя труды показал еси. Мы же, величию благодати Вышняго, на тебе почившия, дивящеся, умиленно взываем: Радуйся, яко видения пренебеснаго света сподобился еси; Радуйся, яко благоволением Божиим великую лавру устроил еси и в ню множество иноков собрал еси. Радуйся, Духовныя овцы к горнему царствию добре управивый; Радуйся, многая чудеса благодатию Святаго Духа сотворивый. Радуйся, ленивыя подвигнувый ревностными подвиги твоего жития христоролюбиваго; Радуйся, печальных скорое утешение. Радуйся, Евангелиа Христова богомудрый учителю; Радуйся, провозвестниче путей господних. Радуйся, вся во уметы вменивый, да Христа приобрящеши; Радуйся, Христу невозвратно последовавый. Радуйся, благий и верный рабе Христов; Радуйся, добрый делателю винограда Христова. Радуйся, пресветлая монахов похвало, Савво преподобне.

Кондак 7.

Хотя верен быти до конца Иисусу Христу, Сыну Божию, взявшему грехи мира, кротость, незлобие, смирение в сердце твоем добре насадил еси, богоносе отче Савво, и всякия скорби, укорения и досаждения радостно претерпел еси, ведая, яко многими скорбьми подобает внити в Царство Небесное. Сего ради, несением креста Христова и терпением скорбей, еще на земли душу твою во обитель Пресвятыя Троицы устроил еси, Ейже ныне предстоиши со ангелы и вопиеша ангельскую песнь: Аллилуиа.

Икос 7.

Дивный воистину победоносец показался еси на страсти плотския, богоблаженне; вся бо разжженныя стрелы лукаваго постом, бдением и слезными молитвами угасил еси. Темже вопием тебе сицевая: Радуйся, крест Христов на рамена твоя восприемый; Радуйся, крестом сим яко лестницею на небо возшедый. Радуйся, терпения и незлобия рачителю; Радуйся, иноков добре подвизающихся молитвенный пред Богом предстателю. Радуйся, веры православныя мощный защитниче; Радуйся, Небеснаго Царствия наследниче. Радуйся, благодатию Божиею приосененный; Радуйся, яко образ страстей Христовых в сердце твоем

предписал еси. Радуйся, светом трисолнечным Святыя Троицы озаренный; Радуйся, яко душевными очима присно Господа созерцал еси. Радуйся, яко благодатию Божию вся провидел еси; Радуйся, благодатными чудесы житие твое озаривый. Радуйся, пресветлая монахов похвало, Савво преподобне.

Кондак 8.

Странника и пришельца помышлял еси в себе быти в мире сем, преблаженне отче Савво; темже грядущаго града Иерусалима Небеснаго взыскупа, вся помышления твоя к небеси непрестанно возносил еси, и яко в тимпане, во умерщвленнем телеси, сладце воспевал еси победную песнь Христу Богу: Аллилуиа.

Икос 8.

Весь облеклся еси во оружия Божия, преподобне; темже возмогл еси всю силу диаволу низложить. Помози убо и нам, преблаженне отче, молитвами твоими избыти сетей вражиих, да благодарственно зовем тебе сице: Радуйся, столпе непреклонный терпения; Радуйся, ревнителю от мира удаления. Радуйся, яко державно плотския страсти низложил еси; Радуйся, яко плоть твою духови покорил еси. Радуйся, яко во бденных молитвах неослабно пребывал еси; Радуйся, яко умерщвлением плоти безстрастие стяжал еси. Радуйся, яко всякое наслаждение земное возненавидел еси; Радуйся, яко тесным и прискорбным путем ходил еси. Радуйся, яко язвы Господа Иисуса Христа на теле твоем носил еси; Радуйся, яко силою креста Господня демонския козни сокрушил еси. Радуйся, вышних идеже Христос седе одесную Отца присно искавый; Радуйся, мысленным оком к невечернему свету Христу непрестанно взиравый. Радуйся, пресветлая монахов похвало, Савво преподобне.

Кондак 9.

Всякое естество ангельское прослави тя, и Церковь восхвали, преподобне отче Савво; ты бо царя неправо мудрствующа и севиры ересеначальники противящияся православнои Церкви небоязненно обличил еси, и все духовное воинство православия совокупив ересь в конец низложил еси, нас же всех во правоверии утвердив, научил еси единогласно воспевати триединому Богу: Аллилуиа.

Икос 9.

Ветия многовещанная недоумеют достойно восхвалити тя, преблаженне; паче бо естества человеческого подвизался еси во вся дни жития твоего. Темже чудесы Христос Бог тебе обогати, яко и зверие дивии повиновахуся и служаху тебе, во

дни же глада молитвою твоею небо дождь даде на землю суху. Сего ради, любовию подвигаеми, вопием тебе таковая: Радуйся, Церкви православныя похвало; Радуйся, еретиков и всех противников правоверия обличителю. Радуйся, яко людей увещати о истине православия потщался еси; Радуйся, за истину православия многия труды и подвиги подъемый. Радуйся, православныя веры светило и утверждение; Радуйся, пророком, апостолом и святителем сопричтенный. Радуйся, христиан правоверных молитвенное ограждение; Радуйся, еретических учений разорителю; Радуйся, православных догматов уяснителю. Радуйся, всем подвигающимся о православии помощниче; Радуйся, пастырей православныя Церкви споспешниче. Радуйся, пресветлая монахов похвало, Савво преподобне.

Кондак 10.

Спасти хотя множество людей твоим попечением, премилосердый Господь достойна тя наставника избра, преблаженне отче Савво; мнози бо тобою на путь спасения наставлени быша, и многи обители твоим тщанием устроишася, в нихже научал еси немолчно воспевати единому Богу: Аллилуиа.

Икос 10.

Стена твердая и крепкое ограждение православных явился еси, преподобне; ходатайством бо твоим мир Церкви Божией даровася. Темже молим тя, преблаженне, буди помощник во всех скорбех и напастех и нам, к заступлению твоему прибегающим, да со умилением вопием тебе сице: Радуйся, пустынночине, мирскую суету возненавидевый и единого Бога искавый; Радуйся, олтаря Господня служителю благоговейный. Радуйся, со всяким тщанием Господу благоугождавый; Радуйся, пламенную любовь ко Христу явивый. Радуйся, многия обители созидавый; Радуйся, множество чад духовных внутрь собравый. Радуйся, во оскудениях и лишениях на Бога уповавый; Радуйся, верою и упованием изобилие плодов земных приемый. Радуйся, тезоименитыя тебе обители страже неусыпный; Радуйся, в бедах, напастех и скорбех помощниче неотступный. Радуйся, иноков ко спасению добрый путеводителю; Радуйся, многомощный молитвенниче о душах наших. Радуйся, пресветлая монахов похвало, Савво преподобне.

Кондак 11.

Пение хвалебное приносим тебе, преподобне отче Савво, и с любовию припадающе ко изображению честнаго лика твоего, восхваляем ангелоподобное житие твое. Ты же, предстоя престолу Пресвятыя Троицы, не престай моляся о нас, ублажающих тя, да сподобимся небеснаго селения достигнути и гласом радования воспети Богу ангельскую песнь: Аллилуиа.

Икос 11.

Светозарный светильник Божия благодати был еси, преблаженне; сего ради в смертнем успении твоём душа твоя, яко солнце сияючи, вознесена бысть святыми ангелы в небесныя обители. Мы же, поминающе твою блаженную кончину и на небеси прославление, радостно вопием ти: Радуйся, угодниче Божий, течение твоея жизни благочестно скончавый; Радуйся, веру, надежду и любовь до конца сохранивый. Радуйся, яко царство и славу вечную наследовал еси; Радуйся, яко по трудех жития земнаго в небесных селениях водворился еси. Радуйся, нетленным венцем славы небесныя от руки Вседержителя увенчанный; Радуйся, блаженство райское со всеми святыми восприемый. Радуйся, ангеле земный и человеке небесный; Радуйся, на небеси и на земли от Господа прославленный. Радуйся, живоносный источниче, благодать исцеления изливаяя; Радуйся, одержимых недуги благодатию Божиею исцеляяй. Радуйся, яко с высоты небесныя на нас [и обитель твою] призираеши; Радуйся, яко всех нас от напастей сохраняеши. Радуйся, пресветлая монахов похвало, Савво преподобне.

Кондак 12.

Благодать и велие твое дерзновение пред Богом введуще, богоносне отче Савво, усердно вопием тебе; не престай моляся тепле ко Господу, да сохранит святую Церковь Свою непозыблему от неверия, ересей и раскола, да избавит нас от бед и лютых обстояний и приведет в царство Свое небесное, яко да поем со благодарением тобою благодееющему нам дивному во святых Богу: Аллилуиа.

Икос 12.

Поюще прославльшаго тя Господа и ублажающе тя, преблаженне отче, прилежно молимся тебе, еже сподобитися и нам ходатайством твоим неосужденно предстати Страшному Судищу Христову, да с радостию и любовию воспоминающе твое молитвенное о нас пред Богом предстательство, благохвально зовем тебе сице: Радуйся, пречестное селение Пресвятыя Троицы; Радуйся, избранное Святаго Духа жилище. Радуйся, сияние незаходимаго солнца; Радуйся, лучами подвигов твоих монашеское житие озаряяй. Радуйся, достойный ангелов собеседниче; Радуйся, мучеников и преподобных на небеси сожителю. Радуйся, яко мзда твоя многа на небеси; Радуйся, Церкви православныя украшение; Радуйся, в бедах сущим скорое вспоможение. Радуйся, теплый о нас молитвенниче; Радуйся, присный иноков помощниче и заступниче. Радуйся, пресветлая монахов похвало, Савво преподобне.

Кондак 13.

О великий и дивный угодниче Христов, преподобне отче Савво! Приими

милостивно сие малое моление, от усердия нашего в похвалу тебе приносимое, и твоим молитвенным предстательством у престола Царя Небесного испроси нам, еже избавитися в жизни сей от всех бед и напастей, в смертном же успении нашем благу часть спасения и наследие вечных благ получитьи, яко да сподобимся с тобою и со всеми святыми в радости вечней во веки воспевати Христу Богу спасителю нашему: Аллилуиа.

(Этот кондак читается трижды)

Икос 1.

Ангелов Творец и вся твари Содетель избра ты от младенства, преподобне, прославити трисиятельное имя Его: ты бо, осмилетен сый вся красная мира тленнаго презрев, во обитель святую притекл еси, идеже яко ангел земный богоугодно подвизался еси. Темже и вселися в тя благодать Пресвятаго Духа, Егоже действием светло украшаяся, ангелоподобное житие показал еси. Мы же, зряще велия исправления твоя, с любовию вопием тебе сице: Радуйся, родителей благочестивых благословенный плоде; Радуйся, каппадокийския страны святое украшение. Радуйся, палестинския земли и града Иерусалима светильниче; Радуйся, во иорданстей пустыни со ангелы вселившийся. Радуйся, яко жертву живую себе Господви принесл еси. Радуйся, евангелиа Христова усердный последователю; Радуйся, заповедей Господних верный блюстителю. Радуйся, яко от юности игу Христову себе поработил еси; Радуйся, яко красоту тленную и мирскую сладость ни во чтоже вменил еси. Радуйся, Божия разума исполненный; Радуйся, благодатию Духа святаго приосененный. Радуйся, пресветлая монахов похвало, Савво преподобне.

Кондак 1.

Избранный чудотворче и предивный угодниче христов, преподобне отче Савво, миру православному светильниче и теплый о нас пред Богом молитвенниче! Величаем прославльшаго тя Господа, восхваляюще любовию равноангельное житие твое. Ты же, яко имеяй велие дерзновение ко Господу, от всяких нас бед свободи, да с радостию зовем ти: Радуйся, пресветлая монахов похвало, Савво преподобне.

Молитва преподобному и богоносному отцу нашему Савве
Освященному, глаголемая в день празднования памяти его.

О предивный и всехвальный угодниче Божий, преподобне отче Савво! Днесь во святем храме твоём, благоговейно предстояще пред святою иконою твоею и радостно совершающе пресветлую память твою, ублажаем тя заступника нашего. Почитающе же твое велие дерзновение пред Господом, смиренно молим тя, преблаженне: приими милостивно от нас

хвалебное пение сие, от любви и усердия тебе приносимое. И, яко имеяй велие дерзновение ко Господу, потщися богоприятным твоим ходатайством испросити у Царя царствующих и Господа господствующих, яко да пробавит великия и богатыя милости своя на нас грешных, да подаст нам дух правыя веры, дух ведения и любви, дух мира и радости о Дусе святе, да избавит от бед и напастей, да низпослет вся полезная ко спасению душ наших. Всем же православным да низпослет мир, тишину, безмятежие, усердие ко исполнению заповедей его, изобилие плодов земных: и да избавит всю русскую страну от глада, труса, потопа, огня, меча, нашествия иноплемennых и междоусобных брани, смертоносных язвы и от всякаго зла. Ей, угодниче Божий! Не презри молитий наших, но услыши нас молящихся тебе, и под кровом заступления твоего сохрани нас [и обитель сию] ненаветны от враг видимых и невидимых, да сподобимся скончати житие наше в покаянии и восприимем вечная блага во царствии Христа Бога нашего, идеже восхвалим с тобою и всеми святыми достопоклоняемое имя Пресвятыя Троицы, Отца и Сына и Святаго Духа, во веки веков. Аминь.